

中國佛寺志叢刊

趙樸初



明・葛寅亮撰

金陵梵刹志
三

廣陵書社

金陵梵剎志卷二十二

中剎青溪鷺峰寺 古剎 勅賜

在都城内中城鈔庫街南青溪地西南去所統天界寺五里齊爲東府城梁爲江總宅唐乾元中刺史顏魯公置放生池東接清溪宋淳熙間待制史正志移於清溪之曲建閣其上歲久湮沒 國朝天順間卽其地建寺賜額鷺峰寺後有塘屬內監相傳爲放生遺址以教坊毀菴隙地易之併構一椽祀魯公而重勒其碑文以存舊蹟寺記稱舊爲梁法光寺法光卽鹿苑寺亦近清溪但按鹿苑記云聖像卽山而成今鷺峰絕無山恐非是

且迴光寺記中亦謂是鹿苑豈因其地相近而誤入耶
所領小刹曰迴光寺千佛菴大中正覺菴

殿堂金剛殿

參

左鐘樓

壹

右鼓樓

壹

天王殿

參

左伽藍

殿

參

右祖師殿

參

正佛殿

參

左觀音殿

參

右輪藏殿

參

毘盧閣

參

迴廊

參

僧院

玖

禪院

貳拾

基址拾畝

東至官路南至官路

西至民家房

北至高牆廠

附顏魯公祠

參

公產租房

壹拾

地

伍畝

柒

山水青溪

輿地志云後湖水迤邐西出至今上水關皆名青溪按溪有九曲寺地亦青溪之曲也

古蹟放生池

顏魯公置史待制改建於此蹟已久湮沒今寺後有塘一口相傳為放生池因復之

以存其蹟**顏魯公書放生池碑**

今重刻

附江總宅

即寺基**清**

溪閣

宋史待制正志
建於放生池上

割青亭

宋段約宅取荆公詩割
我鍾山一半青之句

〔文〕 奉詔立放生池碑

唐昇州刺史顏真卿

顏真卿字清臣嘗受戒於湖州慧明又問道於江
西嚴峻乾元三年肅宗置天下放生池八十一所
公奉詔
立碑

昔殷湯克仁垂一面之網漢武垂惠致含珠之報流水救
涸寶勝稱名蓋事止於當時尚介社於終古豈我今日動
者植者水居涸居舉天下以爲池罄域中而蒙福乘陀羅
尼加持之力竭煩惱海生死之津揆之前古曾何髣髴
乞御書天下放生池碑額表 唐昇州刺史顏真卿

臣某言臣聞帝王之德莫大於生成臣子之心敢忘於讚

述臣去年冬任昇州刺史日屬左驍衛左郎將史元琮等
奉宣恩命於天下州縣臨江帶郭處各置放生池始于洋
州興道訖于昇州江寧秦淮太平橋凡八十一所恩霑動
植澤及昆蟲發自皇心徧於天下歷選列辟未之前聞海
隅蒼生孰不欣喜臣時不揆愚昧輒述天下放生池碑銘
一章又以俸錢於當州採石兼力拙自書蓋欲使天下元
元知陛下有好生之德因令微臣獲廣昔賢善頌之義遂
絹寫一本附史元琮奉進兼乞御書題額以光揚不朽緣
前書點畫稍細恐不堪經久臣今謹據石擘窠大書一本
隨表奉進庶以竭臣下悽悽之誠特乞聖恩俯遂前情則

天下幸甚豈惟愚臣昔秦始皇虐之君李斯邪諂之臣
猶刻金石垂於後代魏文帝外禪之主鍾繇偏方之佐亦
於繁昌立表頌德况陛下以巍巍功業而無紀迹則臣竊
耻之謹昧死以聞伏增戰越

肅宗御荅朕以中孚及物亭育爲心凡在覆載之中畢登
仁壽之域四靈是畜一氣同知江漢爲池魚鼈咸若卿慎
徽盛典潤色大猷能以懿文用刊樂石體含飛動韻合鏗
鏘成不朽之立言紀好生之上德唱而必和自古有之情
發于中予嘉乃意所請者依

青溪閣記

宋朝奉郎張椿

青溪閣在府治東北青溪上本梁江總故宅至國朝爲段約之宅有亭曰割青取荆公詩割我鍾山一半青之句乾道五年秋因移放生池於青溪之曲卽割青故基建閣焉天下山川勝處古今相承往往隨人廢興得其人者雖雲煙草木皆有憑恃德名高自標致亘萬古而不可泯沒之也如其不然亦復憔悴悽愴風悲雨暝過者爲之黯然而山川因人而興者亦不多有孟城北垞本宋延清之別業香山履道之坊蓋楊虛受之故宅王白二公乃發其名而傳後世使其地靈氣英而無人傑以當之亦將錄錄蒙昧不復傳矣金陵古帝都也青谿數曲近在城中晉則爲郗

僧隨之所領覽陳則爲江總持之所據依二人者聲名震
耀曾次丘壑一時游從見於歌詠異時段氏結廬其上王
半山詩之而割青之名遂振兵火後走魑魅埋荆棘獨取
給於漁師老圃之用鍾山之秀無復照映此谿之上今大
帥史公繇甘泉法從宅牧畱京政修戶庭而人自得於一
路十州之外凡地之勝與景之殊者悉表出之六朝以來
人物事迹搜訪具備覺山川益奇登覽益多而聞見益廣
至是青谿數曲之地足歷而心營之因柳堤之舊築層閣
之新忽若飄浮上臨雲氣環城之山畢出斬露朝漪夕嵐
煙顏雨態盡得於指顧之內公聽訟之餘風清月白蘭橈

盡舫時往來其間無紅旗穿市之勞有延綠混碧之觀龜
魚禽鳥欣榮飛躍鳴聲下上而自喜得所遇焉是可爲青
谿賀也一日公顧謂客曰夫豈以游樂故而爲此哉予之
意殆非也嘗迹建康志顏平原爲昇州日據石壁窠大書
奇字以紀乾元放生池者蓋自江寧秦淮連太平橋並江
帶郭皆禁網捕所以宣皇明而廣慈愛也今青谿之地延
袤數里蒲蓮葭葦聯蔓蒼蒨潛深伏奧依戲藻荇不知其
幾千萬億皆欲使之遂性咸若圉圉洋洋游泳恩波以祈
兩宮萬年之壽此予之理是谿創層閣而以時往來其間
者述平原之志舉乾元之實而效藩臣之精愾者也客聞

而嘆乃酌而請曰以公修名推望持橐偃藩深爲聖天子
器重四方之士知公推轂後進桃李滿門願一見公者日
有其人而公寓意幽討寄興滄洲峴山南樓比迹羊庾又
能展廓是谿涵濡品類使鳧鷖行哺鷗狎不驚而盡所以
鄉慕古人尊君愛上之意則是谿之遇寧有既乎谿之遇
公固得其所公方且以宏遠之摹經畧中原勒功彝鼎公
則有時而去也公去而位愈尊而谿之名愈大矣可不記
歟椿於公爲門下士乃據其實而書之公名正志字志道
南徐人乾道己丑中秋日右朝奉郎權發遣和州軍州主
管學事兼管內勸農管田屯田事借紫龍舒張椿記

放生池記

宋景定建康志

案舊圖經唐乾元中詔於江寧秦淮太平橋臨江帶郭上下五里置放生池八十一所有碑昇州刺史顏真卿文舊以府治東東接青溪北通運瀆者爲之舊志今秦園之側府學之東卽古放生池也淳熙間史待制正志移放生池於青溪建閣其上遇祝聖立班閣下府學遂因舊放生池爲泮水其流亦通青溪王尚書埜以其池乃祝聖之地立板榜於舞雩亭門禁漁捕池近行路水深而堤不固時有溺死者馬公光祖聞而憫之池名放生豈容有溺死者乃命能仁寺僧築堤甃街立大木爲欄檻自是無溺者矣又

修闢青溪閣前爲飛梁繚以朱欄深迥汪洋塵迹莫能到也

鷲峰寺碑記畧

明禮部尚書杭郡鄒幹

都城秦淮之南有地曰清溪舊有法光禪寺建自梁武帝天監年歷唐宋以來歲久廢毀遺址猶存 國朝天順間進公保開拓舊址重新構造佛殿三間翼然嚴正簷牙棟宇遠近相望殿之前四天王殿殿之後有毘盧閣左廡之半建觀音殿簇以畫廊二十餘間右廡之半建藏經殿亦簇以畫廊二十餘間俱彩繪其壁東廊之前爲鐘樓西廊之前爲鼓樓樹以碑銘又於正殿之東闢地數畝建佛堂

方丈以爲講經之所飯僧有堂庖漏有所棲僧有寮退居
有舍池塘遶其後金城抱其左歲戊子工克告成特 賜
鷲峰禪寺 成化三年十一月日

復顏魯公放生碑

蹟併崇祀小記

明南祠部郎錢塘葛寅亮

唐乾元詔置放生池於昇州秦淮刺史顏魯公爲文記之
又表請御書題額宋制使馬公光祖徙池於青溪之曲建
青溪閣溪曲凡九湮塞僅存其一鷲峰寺寔古青溪曲中
宋下彬謁齊高帝東府曰以青溪爲鴻溝光祖之詩曰江
家宅畔成花圃東府門前作菜園邑志稱鷲峰卽古東府
城處今寺後有陂塘數畝菜隴千畦與蓮地蘭扁分青映

綠彷彿光祖當時所見而塘亦相傳汝生遺蹟卽數百年
來陵谷遷變未遽信然第此處青溪一帶尺寸之波惡知
非舊派所流而搜討湮沒寧使遺憾因詢斯塘爲內監所
轄以教坊隙地相與抵易當時臨江帶郭上下五里而今
僅一區亦存千百於什一耳獨池復而魯公之碑垂波薤
露曾不得其殘痕半字拂蘚讀之臨風賞快如公純忠壯
節標烈騰景千古有生氣忍俾沒沒使人不見其風流乃
重撫其文勒之石併構一椽池上以祀公焉嗟呼鄴令之
渠興思異代顯陵之策終見嵩山志復古者將毋摩娑其

下

全唐詩集卷之九
二二
過青溪王昌齡宅

唐常建

青溪深不測，隱處唯孤雲。
松際露微月，清光猶爲君。
茅屋宿花影，藥院滋苔文。
予亦謝時去，西山鸞鶴羣。

青溪草堂閒興

南唐李建勳

牕外階連水，松杉欲作林。
自憐趨競地，獨有愛閒心。
素壁題堪遍，危冠醉不簪。
江僧暮相訪，簾捲見秋岑。

青溪

宋馬光祖

人道青溪有九曲，如今一曲僅能存。
江家宅畔成花圃，東府門前作菜園。
登閣自堪觀疊嶂，汎舟猶可醉芳樽。
料應當日皆無恙，若雪瀟湘不足言。